

**PRAVILNIK O REGISTRU DOMAĆIH I
MEĐUNARODNIH ČASOPISA I ZBORNIKA RADOVA
SA NAUČNIH SKUPOVA UNIVERZITETA "DŽEMAL
BIJEDIĆ" U MOSTARU**

Mostar, januar 2019. godine

Na osnovu člana 72. Statuta Univerziteta "Džemal Bijedić" u Mostaru, Senat Univerziteta "Džemal Bijedić" u Mostaru na svojoj 85. sjednici održanoj 31.1.2019. godine, donio je

PRAVILNIK

O REGISTRU DOMAĆIH I MEĐUNARODNIH ČASOPISA I ZBORNIKA RADOVA SA NAUČNIH SKUPOVA UNIVERZITETA "DŽEMAL BIJEDIĆ" U MOSTARU

DIO PRVI - OPŠTE ODREDBE

Član 1. **(Predmet Pravilnika)**

Ovim Pravilnikom uređuje se način formiranja i vođenja Registra domaćih i međunarodnih časopisa i zbornika radova sa naučnih skupova (serijskih publikacija) i indeksnih baza Univerziteta (u daljnjem tekstu: Registar) te kriteriji i postupak registracije.

Član 2. **(Serijska publikacija)**

- (1) Pod serijskom publikacijom podrazumijeva se svaka publikacija koja izlazi u određenom broju svezaka ili brojeva, redovno u određenim vremenskim periodima.
- (2) U serijske publikacije ubrajaju se sve vrste novina, časopisa, zbornika radova i zbornika radova s konferencija, simpozija, kongresa, okruglih stolova i sl., a koji se redovno održavaju u određenom vremenskom periodu.
- (3) Svaka serijska publikacija prepoznaje se po svom ISSN (engl. International Standard Serial Number), odnosno po međunarodno prihvatljivom kodu koji omogućava identifikaciju serijske publikacije nezavisno o jeziku ili zemlji u kojoj je objavljena. U izuzetnim slučajevima serijska publikacija može uz ISSN (engl. International Standard Serial Number) imati i ISBN broj (engl. International Standard Book Number), ali se ne može identificirati po njemu

Član 3.
(Indeksne baze)

- (1) Glavne indeksne baze su indeksne baze u kojima su registrovani najznačajniji časopisi iz pojedinih oblasti, a inicijalna lista glavnih indeksnih baza podataka je sastavni dio Registra, uz mogućnost dopune prema kriterijima, na način i u postupku normiranom odredbama ovog Pravilnika.
- (2) Ostale indeksne baze su baze u kojima su registrovane druge referentne publikacije, a inicijalna lista ostalih indeksnih baza podataka je sastavni dio Registra, uz mogućnost dopune prema kriterijima, na način i u postupku normiranom odredbama ovog Pravilnika.

Član 4.
(Sadržaj Registra)

- (1) Registar publikacija se sastoji iz četiri (4) dijela:
 - I. Glavne indeksne baze podataka – predstavlja listu baza u kojima su registrovani najznačajniji časopisi iz pojedinih oblasti, a inicijalna lista indeksnih baza je sastavni dio Registra, uz mogućnost dopune prema kriterijima, na način i u postupku normiranom odredbama ovog Pravilnika
 - II. Ostale indeksne baze podataka – predstavlja listu baza u kojima su registrovane druge referentne publikacije, a inicijalna lista indeksnih baza je sastavni dio Registra, uz mogućnost dopune prema kriterijima, na način i u postupku normiranom odredbama ovog Pravilnika.
 - III. Međunarodne serijske publikacije – predstavlja listu međunarodnih serijskih publikacija koje se ne nalaze u dijelu I. ili II. ovog člana;
 - IV. Domaće serijske publikacije – predstavlja listu publikacija koje se ne nalaze u stavu I. i II. ovog člana, a koje su izdate od strane relevantnih domaćih institucija.
- (2) Svaka indeksna baza u Registru je opisana sljedećim podacima: naziv baze, URL baze, područje koju pokriva, datum registracije i datum posljednjeg ažuriranja.
- (3) Svaka serijska publikacija u Registru je opisana sljedećim podacima: naziv serijske publikacije, ISSN broj (izuzetno uz ISSN i ISBN broj), naziv izdavača, datum registracije i datum posljednjeg ažuriranja.

Član 5.
(Vođenje, održavanje i objavljivanje Registra)

Registar domaćih i međunarodnih časopisa i zbornika radova sa naučnih skupova Univerziteta vodi i održava Univerzitetska biblioteka i čini ga javno dostupnim putem univerzitetske web stranice.

**DRUGI DIO – POSTUPAK I KRITERIJI REGISTRACIJE SERIJSKIH
PUBLKACIJA I INDEKSNIH BAZA PODATAKA**

Član 6.
(Registrowanje serijskih publikacija i indeksnih baza podataka)

- (1) Prijedlog da se serijska publikacija ili indeksna baza podataka uvrsti u Registar Senatu Univerziteta podnosi Nastavno-naučno vijeće organizacione jedinice ili univerzitetskog studija.
- (2) Prijedlog iz stava 1. ovog člana mora biti potpun i obrazložen, sa dokumentacijom koja dokazuje i obrazloženjem koje precizira ispunjenost svakog pojedinačnog kriterija propisanog kao uslov za uvršavanje u Registar.
- (3) Nepotpun i neobrazložen prijedlog, ukoliko ne bude dopunjen i obrazložen u roku od 15 dana, u skladu sa odredbama ovog Pravilnika, odbacuje se.
- (4) Uz prijedlog, Nastavno-naučno vijeće organizacione jedinice ili univerzitetskog studija obavezno prilaže:
 - a) Za serijsku publikaciju: kopiju impresuma i naslovne strane predložene publikacije, kopiju najmanje jednog članka, URL (web adresu) na kome se mogu pronaći detaljne informacije o publikaciji, ostalu dokumentaciju kojom se dokazuje da publikacija predložena za uvrštavanje u Registar ispunjava svaki pojedinačni kriterij propisan ovim Pravilnikom kao uslov za uvršavanje u Registar i obrazloženje koje precizira ispunjenost svakog pojedinačnog kriterija propisanog kao uslov za uvrštavanje u Registar.
 - b) Za indeksnu bazu podataka: naziv indeksne baze podataka, URL baze, područje koje obuhvata, preciziranje da li se predlaže uvrštavanje indeksne baza podataka dio I ili II Registra, ostalu dokumentaciju kojom se dokazuje da indeksna baza podataka predložena za

uvršavanje u Registar ispunjava svaki pojedinačni kriterij propisan ovim Pravilnikom kao uslov za uvrštavanje u Registar i obrazloženje koje precizira ispunjenost svakog pojedinačnog kriterija propisanog kao uslov za uvrštavanje u Registar.

- (5) Dokumentaciju definisanu stavom 4. ovog člana potrebno je dostaviti i elektronskim putem na email adresu Prorektora za nauku i naučnoistraživački rad.
- (6) Sadržaj Registra obuhvata i sve serijske publikacije koje su uvrštene u Registar prije stupanja na snagu ovog Pravilnika, a koje će u Registru, nakon stupanja na snagu ovog Pravilnika, biti klasificirane u skladu sa članom 4. stav 1. ovog Pravilnika.

Član 7.

(Kriteriji registracije indeksnih baza podataka)

- (1) Pored inicijalne liste indeksnih baza podataka koje su sastavni dio Registra, u Registar se mogu registrovati i ostale indeksne baze podataka koje sadrže preko stotinu (100) serijskih publikacija koje ispunjavaju uslove iz člana 8. i 9. ovog Pravilnika.
- (2) Prilikom određivanja u koji dio Registra se registruje predložena indeksna baza podataka biti će primjenjen i kriterij broja serijskih publikacija, pri čemu je za registraciju u dio I Registra minimalan broj sadržanih serijskih publikacija 1000, od čega su većina časopisi.

Član 8.

(Kriteriji registracije serijskih publikacija)

U Registar se mogu registrovati serijske publikacije koje ispunjavaju međunarodne izdavačke standarde, odnosno serijske publikacije koje ispunjavaju sljedeće kriterije:

1. Periodičnost izlaženja (serijska publikacija mora izlaziti redovno i u skladu s naznačenom frekvencijom izlaženja);
2. Poštovanje međunarodnih izdavačkih konvencija, a posebno:
 - Publikacija mora imati informativan naziv koji treba jasno upućivati na sadržaj publikacije;
 - Svaki članak mora imati normiranu bibliografiju i standardizirano navođenje citata;
 - Svaki članak treba da je recenziran.
3. Impresum serijske publikacije mora sadržavati osnovne podatke o publikaciji, a posebno naslov publikacije, ISSN broj (izuzetno uz ISSN i ISBN broj) godinu izdavanja, godište izlaženja, broj tekućeg sveska, mjesto izdavanja, naziv izdavača, sastav i adresa uredništva, te podatak o učestalosti izlaženja;
4. Međunarodni ugled i karakter, odnosno, da u sastavu uredništva ima najmanje 1/3 članova izvan Bosne i Hercegovine.

Član 9.

(Posebni kriteriji registracije publikacija sa konferencija, simpozija, kongresa i ostalih sličnih skupova)

- (1) U Registar se mogu registrovati i serijske publikacije sa konferencija, simpozija, kongresa i ostalih sličnih skupova. Za registraciju u Registar, pored kriterija iz člana 6., pomenute publikacije moraju ispunjavati i sljedeće posebne kriterije:
- a) Zbornik radova mora dolaziti s tradicionalne (godišnje, dvogodišnje) konferencije koja je održana više od tri puta zaredom i u kojem su objavljeni radovi u punom obimu u štampanoj i/li elektronskoj formi;
 - b) Svaki rad u zborniku koji je objavljen na jezicima naroda u Bosni i Hercegovini mora pratiti sažetak rada na najmanje jednom stranom jeziku;
 - c) Naučni odbor skupa u svom sastavu mora imati najmanje $\frac{1}{3}$ članova izvan Bosne i Hercegovine;
 - d) Zbornik radova mora biti katalogiziran prema međunarodnim i domaćim katalogoškim standardima u nacionalnoj biblioteci zemlje u kojoj se održava skup (ISSN ili ISBN broj);

Član 10.

(Ažuriranje Registra)

- (1) Za registrovane indeksne baze podataka ili serijska publikacija u sastavu Registra svakih četiri godine, počevši od dana stapanja na snagu ovog Pravilnika, provjerava se ispunjenost uslova definisanih u članovima 7., 8. i 9. ovog Pravilnika, na način, prema kriterijima i u postupku propisanom za uvrštavanje serijske publikacije ili indeksne baze u Registar.
- (2) Registrovana indeksna baza ili serijska publikacija mogu se brisati iz Registra i prije isteka četiri godine ukoliko se ustanovi da nisu ispunjeni uslovi definisani u članovima 7., 8. i 9. ovog Pravilnika.

DIO TREĆI - PRELAZNE I ZAVRŠNE ODREDBE

Član 11. (Donošenje Pravilnika)

- (1) Ovaj Pravilnik donosi Senat Univerziteta.
- (2) Izmjene i dopune Pravilnika vrše se na način istovjetan njegovom donošenju.

Član 12. (Nadzor nad provedbom)

Nadzor nad provedbom ovog Pravilnika vrši Senat Univerziteta i Prorektor za nauku i naučnoistraživački rad.

Član 13. (Tumačenje Pravilnika)

Tumačenje ovog Pravilnika daje Senat Univerziteta i Prorektor za nauku i naučnoistraživački rad.

Član 14. (Stupanje na snagu Pravilnika)

Ovaj Pravilnik stupa na snagu danom donošenja, a primjenjivati će se u postupku izbora nastavnika i saradnika Univerziteta u nastavna i saradnička zvanja.

Broj:101-302/19



Predsjedavajući Senata
Univerziteta "Džemal Bijedić" u Mostaru


prof. dr. Elvir Zlomušica, rektor